

Hukumu Yote kwa Mwana,

Maana kama vile Baba alivyo na uzima nafsini mwake, vivyo hivyo alimpa na Mwana kuwa na uzima nafsini mwake. Naye akampa amri ya kufanya hukumu kwa sababu ni Mwana wa Adamu. Yohana 5:26,27.

Baba amemkabidhi hukumu yote kwa Mwana. Kristo atatangaza thawabu ya uaminifu. "Baba hamhukumu mtu ye yote, bali amempa mwana hukumu yake... Naye ampa amri ya kufanya hukumu kwa sababu ni Mwana wa Adamu." Kristo aliukubali ubinadamu na kuishi ulimwenguni maisha safi na matakatifu. Kwa sababu hii amepokea uteuzi wa kuwa Jaji. Yeye mwenye cheo cha Jaji ni Mungu aliyedhihirishwa katika mwili.

Tutafurahi kiasi gani kumtambua huyu Mwalimu na mkombozi wetu, akiwa bado na alama za msalaba, zinazotoa mwangaza wa utukufu, zikiongeza thamani ya ziada kwa taji ambazo waliokombolewa wanapokea kutoka katika mikono Yake, mikono ile ile iliyonyooshwa kuwabariki wanafunzi Wake wakati alipokuwa akipaa kwenda mbinguni. Sauti ile ile iliyosema "na tazama, Mimi nipo pamoja nanyi siku zote, hata ukamilifu wa dahari" inawaambia wale aliowakomboa kukaribia katika uwepo Wake. Yule yule aliyetoa maisha Yake kwa ajili yao, ambaye kwa neema Yake huiongoza mioyo yao katika toba, anayewapa utambuzi wa hitaji lao la toba, anawapokea sasa katika furaha Yake. Tazama, jinsi wanavyompenda! Kile wanachokipata kutokana na tumaini lao ni kikubwa mno kuliko matarajio yao. Furaha yao imekamilika na wanachukua taji zao zinazo metameta na kuzitupa miguuni pa Mwokozi wao...

Hukumu itaendeshwa sawa sawa na sheria ambazo Mungu ameziweka. Kwa sheria ambazo mwanadamu anatakiwa kuzitii sasa, lakini ambazo wengi wanakataa kuzikubali, wote watahukumiwa. Kama ambavyo tabia zao zinavyopimwa kwa hizo sheria, kila mmoja atapata nafasi yake sahihi katika mojawapo ya makundi haya mawili. Anaweza kuwa ama mtakatifu kwa Bwana kupitia utii wa sheria Zake au kutiwa doa na dhambi kupitia kwa uvunjaji wa sheria... Atawaweka kondoo mkono Wake wa kuume na mbuzi mkono Wake wa kushoto. Kisha wanamume na wanawake watatambua kwamba matendo yao ndiyo yameamua hatima yao (The Review and Herald, Juni 18, 1901).

Suala zima la hukumu limekabidhiwa kwa Kristo, kwa sababu ni Mwana wa Adamu. Hakuna Asilolijua. Haidhuru uasi wa kiroho uwe wa kiwango cha juu na wenye nguvu kiasi gani, Aliye juu zaidi na mkuu kabisa amezichukua dhambi za ulimwengu wote. Ana haki, wema na ukweli usio na kikomo. Anao uweza wa kudhibiti falme na mamlaka na uovu wa kiroho katika mahali pa juu. Akiwa amevikwa na kubeba silaha kama Kamanda wa jeshi la Bwana, Anakuja mbele ili kuwalinda watu Wake. Haki Yake huwafunika wale wote wanaompenda na kumwamini. Mkuu huyu wa majeshi, analiongoza jeshi la mbinguni kusimama kama ukuta wa moto kuwazunguka watu Wake. Yeye peke Yake ni jaji wa haki yao, kwa sababu aliwaumba na kwa gharama isiyo na ukomo kwake Mwenyewe aliwakomboa. Atahakikisha kwamba utii kwa amri za Mungu unatunukiwa (The S.D.A. Bible Commentary, Ellen G. White Comments, vol. 5, 1134).